

四庫全書

史部

欽定四庫全書

春秋別典卷十五

明 薛虞畿 撰

魯哀公

十五年起

芊尹文者楚之毆鹿毘者也司馬子期獵于雲夢載旗
之長于地芊尹文拔劍齊諸軫而斷之貳車抽弓於韞
援矢於箛引而未發也司馬子期伏軾而問曰吾有罪
于夫子乎對曰臣以君旗拽地故也國君之旗齊于軫
大夫之旗齊于軾今子楚國有名大夫而滅三等文之

斷也不亦可乎子期悅載之王所王曰吾聞有斷子之
旗者其人安在吾將殺之子期以文之言告王王悅使
文為江南令而大治

白公問孔子曰人可與微言乎孔子不應白公問曰若
以石投水何如孔子曰吳之善沒者能取之曰若以水
投水何如孔子曰渑淄之合易牙嘗而知之白公曰人
固不可以微言乎孔子曰何為不可唯知言之謂者乎
夫知言之謂者不可以言言也爭魚者濡逐獸者趨非

樂之也故至言去言至為無為夫淺知之所爭者末矣
白公不得已遂死于浴室

楚太子建以費無極之譖見逐建有子曰勝在外子西
召勝使治白號曰白公勝怨楚逐其父將弑惠王及子
西欲得易甲

人姓名

陳士勒兵以示易甲曰與我無患不

富貴不與我則此是也易甲笑曰嘗言吾義矣吾子忌
之乎立得天下不義吾不取也威吾以兵不義吾不從
也今子將弑子之君而使吾從子非吾義也子雖告我

以利威我以兵吾不忍為也子行子之威則吾亦得明
吾義也逆子以兵爭也應子以聲鄙也吾聞士立義不
爭行死不鄙拱而待兵顏色不變也

白公之難楚人有莊善者辭其母將往死之其母曰棄
親而死其君者義乎莊善曰吾聞事君者內其祿而外
其身今所以養母者君之祿也身安得無死乎遂辭而
行比至公門三廢車中其僕曰子懼矣曰懼既懼何不
返善曰懼者吾私也死義吾公也聞君子不以私害公

及公門刎頸而死君子曰好義乎哉

白公勝既殺令尹司馬欲立王子閭以為王王子閭不肯劫之以刃王子閭曰王孫輔相楚國匡正王室而後自庇焉閭之願也今子假威以暴王室殺伐以亂國家吾雖死不予從也白公勝曰楚國之重天下無有天以與子何不受也王子閭曰吾聞辭天下者非輕其利也以明其德也不為諸侯者非惡其位也以潔其行也今吾見國而忘主不仁也劫白刃而失義不勇也子雖告

我以利威我以兵吾不為也白公強之不可遂殺之葉
公子高率衆誅白公而反惠王於國

白公勝將弑楚惠王惠王出令尹司馬皆死拔劍屬之
於屈廬曰子與我將舍子子不與我必殺子廬曰子殺
叔父而求福於廬也可乎吾聞多命之士見利不動臨
死不恐為人臣也時生則生時死則死是謂人臣之禮
故上知天命下知臣道其有可劫乎子胡不推之白公
勝乃內其劍

趙襄子謂仲尼曰先生委質以見人主七十君矣而無所通不識世無明君乎意先生之道固不通乎仲尼不對異日襄子見子路曰嘗問先生以道先生不對知而不對則隱也隱則安得為仁若信不知安得為聖子路曰建天下之鳴鐘而撞之以槌豈能發其聲乎君問先生無乃猶以槌撞鐘乎

趙襄子攻翟勝老人中人使者來謁之襄子方食有憂色左右曰一朝而兩城下人之所喜也今君有憂色何

襄子曰江河之大也不過三日飄風暴雨日中不須臾
今趙氏之德行無所于積一旦而兩城下亡其及我乎
孔子聞之曰趙氏其昌乎夫憂所以為昌也而喜所以
為亡也勝非其難者也持之其難者也唯有道之主能
持勝

石乞侍坐于屈建屈建曰白公其為亂乎石乞曰是何
言也白公至于室無營所下士者三人與已相若臣者
五人所與同衣食者千人白公之行若此何故為亂屈

建曰此建之所謂亂也以君子行則可于國家行過禮則國家疑之且苟不難下其臣必不難高其君矣建以是知夫子將為亂也處十月白公果為亂

白公勝慮亂罷朝而立倒杖策鋌上貫顙血流至地而不知也鄭人聞之曰顙之忘將何不忘哉

齊人有子蘭子者事白公勝勝將為難乃告子蘭子曰吾將舉大事子國願與子共之子蘭子曰我事子而與子殺君是助子之不義也畏患而去子是遁子於難也

故不與子殺君以成吾義契領于庭以遂吾行

楚有申鳴者在家而養其父孝聞于楚國王欲授之相
申鳴辭不受其父曰王欲相汝汝何為不受乎申鳴對
曰舍父之孝子而為王之忠臣何也其父曰使有祿于
國立義于庭汝樂吾無憂矣吾欲汝之相也申鳴曰諾
遂入朝楚王因授之相居三年白公為亂殺司馬子期
申鳴將往死之父止之曰棄父而死其可乎申鳴曰聞
夫仕者身歸于君而祿歸於親今既去父事君得無死

其難乎遂辭而往因以兵圍之白公謂石乞曰申鳴者
天下之勇士也今以兵圍我吾為之奈何石乞曰申鳴
者天下孝子也往劫其父以兵申鳴聞之必來因與之
語白公曰善則往取其父持之以兵告申鳴曰子與吾
與子分楚國子不與吾則子父死矣申鳴流涕而應之
曰始吾父之孝子今吾君之忠臣也吾聞之也食其食
者死其事受其祿者畢其能今吾已不得為父之孝子
矣乃君之忠臣也吾何得以全身援枹鼓之遂殺白公

其父亦死王賞之金百斤申鳴曰食君之食避君之難非忠臣也定君之國殺臣之父非孝子也名不可兩得行不可兩全也如此而生何面目立於天下遂自殺也葉公諸梁問樂王鮒曰晉大夫趙文子為人何若對曰好學而受規諫葉公曰疑未盡之矣對曰好學智也受規諫仁也江出汶上其源若甕口至楚國其廣千里無他故其下流多也人而好學受規諫宜哉其立也詩云其維哲人告之話言順德之行此之謂也

子羔為衛政別人之足衛之君臣亂子羔走郭門閉別者守門曰於彼有缺子羔曰君子不踰曰於彼有竇子羔曰君子不隧曰於此有室子羔入追者罷子羔將去謂別者曰吾不能虧損主之法令而親別子之足吾在難中此乃子之報怨時也何故逃我別者曰斷足固我之罪也無可奈何君之治臣也側傾法令先人後臣欲臣之免于法也臣知之獄決罪定臨當論刑君愀然不樂見于顏色臣又知之君豈私臣哉天生仁人之心其

固然也此固臣所以脫君也孔子聞之曰善為吏者樹德不善為吏者樹怨公以行之其子羔之謂乎

按左傳
衛輒出

奔在襄十六年
子路死子羔出

季康子謂子游曰仁者愛人乎子游曰然人亦愛之乎子游曰然康子曰鄭子產死鄭人丈夫舍珮玦婦人舍

珠珥夫婦巷哭三月不聞竽瑟之聲仲尼之死

在十六年吾

不聞魯國之愛夫子何也子游曰譬子產之與夫子其猶浸水之與天雨乎浸水所及則生不及則死斯民之

生也必以時雨既以生莫愛其賜故曰譬子產之與夫子猶浸水之與天雨也

按左哀十六年孔子卒

宋景公時熒惑在心懼名子韋而問曰熒惑在心何也子韋曰熒惑天罰也心宋分野也禍當君身雖然可移於相公曰相所使治國也而移死焉不祥寡人當自請也子韋曰可移于民公曰民死將誰君乎寧獨死耳子韋曰可移于歲公曰歲饑民餓必死為人君欲殺其民以自活其誰以我為君乎是寡人之命固盡矣子無

復言矣子韋還走北面再拜曰臣敢賀君天之處高而聽卑君有仁人之言三天必三賞君今夕星必徙舍君延壽二十一歲公曰子何知之對曰君有三善故三賞星必三舍行七星之當一年三七二十一故曰延二十一年臣請伏於陛下以司之星不徙臣請死之公曰可

是夕也星三徙舍如子韋言

史記年表宋變惑守心在十五年

楚太宰子朱侍飯於令尹子國子國啜羹美而熱投匕漿而沃之明日太宰子朱辭官而歸其僕曰楚太宰未易

得也辭官去之何也子朱曰令尹輕行而簡禮其辱人

不難明年伏郎尹而答之三百

子國白公亂後十七年見傳子西子

越王問於大夫文種曰吾欲伐吳可乎對曰可矣吾賞厚而信罰嚴而必君欲知之何不試焚宮室於是遂焚宮室人莫之救乃下令曰人之救火死者比死敵之賞救火而不死者比勝敵之賞不救火者比降北之罪人塗其體被濡衣而赴火者左三千人右三千人此知必勝

之勢也

按傳哀十七年越伐吳敗之

越王慮伐吳欲人之輕死也出見怒轟乃為之式從者
曰奚敬於此王曰為其有氣故也明年之戰以頭獻王
者幾十餘人

石益謂孫伯曰吳將亡矣子亦知之乎孫伯曰晚矣子
之知之也吾何為不知石益曰然則子何以不諫孫伯
曰昔桀罪諫者紂焚聖人剖王子比干之心袁氏之婦
絡而失其紀其妾告之怒棄之夫亡者豈欲人知其過
哉

越王勾踐好勇教其士臣三年以其知為未足以知之
焚舟失火鼓而進之其士驅前列伏水火而死有不可
勝數也當此之時不鼓而進也

越伐吳乃先宣言曰我聞吳王築如皇之臺掘深池罷
苦百姓煎靡財貨以盡民力余為民誅之

曾從子善相劍者也衛君怨吳王曾從子曰吳王好劍
臣相劍者也臣請為吳王相劍拔而示之因為君刺之
衛君曰子之為是也非緣義也為利也吳強而富衛弱

而貧子必往吾恐子為吳王用之於我也乃逐之

隰斯彌見田成子與登臺四望之面北暢南望隰子家之樹蔽之田成子亦不言隰子歸使人伐之斧離數創隰子止之其相室曰何變之數也隰子曰古者有諺曰知淵中之魚者不祥夫成子將有事事大而我示之知微我必危矣不伐樹未有罪也知入之所不言其罪大矣乃不伐也

陳成子謂鵠夷子曰何與常也對曰君死吾不死君亡

吾不亡陳成子曰然子何以與常對曰未死去死未亡
去亡其有何死亡矣從命利君謂之順從命病君謂之
諛逆命利君謂之忠逆命病君謂之亂君有過不諫諍
將危國殞社稷也有能進言子君用則留之不用則去
之謂之諫用之可生不用則死謂之諍比和同力率羣
下相與彊矯君雖不安不能不聽遂解國之大患除國
之大害成於尊君安國謂之輔有君之命任君之事竊
君之重以安國之危除主之辱攻伐足以成國之大利

謂之弼故諫諍輔弼之人社稷之臣明君之所專禮而
闇君以為已賊故明君之所賞闇君之所殺也明君好
問闇君好獨明君上賢使能而享其功闇君畏賢妬能
而滅其業罰其忠而賞其賊夫是之謂至闇桀紂之所
以亡也詩云曾是莫聽大命以傾此之謂也

范蠡行遊與齊屠地居奄忽寵變仁義沈浮湯湯慨慨
天地同憂

鴟夷子事田成子田成子去齊走而之燕鴟夷子負傳

而從至望邑子皮曰子不聞涸澤之蛇乎涸澤蛇將徙
有小蛇謂大蛇曰子行而我隨之人以為蛇之行者耳
必殺子不如相銜負我以行人必以為神君也乃相銜
負以越公道而行人皆避之曰神君也今子美而我惡
以子為我上客千乘之君以子為我使者萬乘之卿也
子不如為我舍人田成子因負傳而隨之至逆旅逆旅
之君待之甚重因獻酒肉

襄子擊殺代王因舉兵平代地而迎其姊趙夫人夫人

曰吾受先君之命事代之王今十有餘年矣代無大故而主殘之今代已亡吾將誰歸且吾聞婦人執義無二夫吾豈有二夫哉欲迎我何之以弟慢夫非義也以夫怨弟非仁也吾不敢怨然亦不歸遂呼天而自殺於摩笄之地代人懷之

趙簡子病

按史記簡子病在晉平公十七年魯悼公之十年

召太子曰我死已

葬服衰上夏屋之山以望簡子死已葬襄子上夏屋以望代俗襄子曰先君必以此教之歸慮所以取代先善

之代君好色以其弟姊妻之所以善代者以萬故襄子
謁代君請觴之令舞者置兵羽中具大金斗酒酣反斗
擊之舞者孫兵以鬪其妻聞之磨笄自刺故趙氏至今
有磨笄反斗之號

趙簡子薨而未葬而中年畔之葬五日襄子興師而攻
之圍未匝而城自壞者十丈襄子擊金而退之軍吏諫
曰君誅中年之罪而城自壞者是天助之也君曷為而
退之襄子曰吾聞之於叔向曰君子不乘人於危不厄

人於險使其治城然後攻之中牟聞其義而請降

佛肸以中牟叛設祿邑炊鼎曰與我者受邑不與我者

烹中牟之士皆從之城北田基

一作田界
亦中牟人

獨後至袪衣

將入鼎曰義死不避斧鉞之罪義窮不受軒冕之服無

義而生不仁而富不如烹佛肸脫履而生之趙氏屠中

牟得而取之論有功者田基為始田基曰不可一人舉

而萬夫俛首智者不為也賞一人以慙萬夫義者不取

也我受賞則中牟之士終自慙矣以行臨人不道吾去

矣襁負其母南徙于楚楚王高其義待以司馬

佛肸叛疑在十

七年之前孔子未

卒故論語記之

勾踐已平吳

傳二十二
年吳亡

乃以江北渡淮與齊晉諸侯會

於徐州致貢於周周元王使人賜勾踐胙命為伯勾踐已

去渡淮南以淮上地與楚歸吳所侵宋地于宋與魯泗

水東方百里當是時越兵橫行於江淮東諸侯畢賀號

稱霸王

越已勝吳又索卒於楚而攻晉左史倚相謂楚王曰夫

越破吳豪士死銳卒盡大甲傷今又索卒以攻晉示我
不病也不如起師與分吳楚王曰善因起師而從越越
王怒將擊之大夫種曰不可吾豪士盡大甲傷我與戰
必不克不如賂之乃賂露山之陰五百里以貽之

越破吳請師于楚以伐晉楚王與大夫皆懼將許之左
史倚相曰此恐吾攻已故示我不病請為長轂千乘卒
三萬與分吳地王聽之遂取東國

越王勾踐使廉稽獻民于楚王楚王使者曰越夷狄之

國也臣請欺其使者楚王曰越王賢人也其使者亦賢
子其慎之使者出見廉稽曰冠則得以俗見不冠不得
見廉稽曰夫越亦周之列封也不得處于大國而處江
海之波與魴鱸魚鼈為伍文身剪髮而後處焉今來至
上國必曰冠得俗見不冠不得見如此則上國使適越
亦將剝墨文身剪髮而後得以俗見可乎楚王聞之披
衣出謝

晉智伯伐鄭齊田恒救之有咎蓋必身立焉車徒有不

進者必令助之壘合而後敢處井竈成而後敢食智伯
曰吾聞田恒新得國而愛其民內同其財外同其勤勞
治軍如此其得衆也不可待也乃去之耳

哀二十七年見傳

智

伯欲襲衛故遺之乘馬先之一璧衛君大悅酌酒諸大
夫皆喜南文子獨不喜有憂色衛君曰大國禮寡人寡
人故酌諸大夫酒諸大夫皆喜而子獨不喜有憂色者
何也南文子曰無方之禮無功之賞禍之先也我未有
往彼有以來是以憂也於是衛君乃修津梁而擬邊城

智伯聞衛兵在境上乃止

吳赤市使於智伯氏假道於衛甯文子具紵絺三百襲將以送之大夫豹曰吳雖大國也不壤交遊之道則亦敬矣又何禮焉甯文子不聽遂致之吳赤市至於智氏既得事將歸吳智伯命造舟為梁吳赤市曰吾聞之天子濟于水造舟為梁諸侯維舟大夫方舟方舟臣之職也且敬太甚必有故使人視之則用兵在後矣將以襲衛吳赤市曰衛假吾道而厚贈我我見難而不告是與

為謀也稱疾而留使人告衛人警滅智伯聞之乃止

智伯囂之時有士曰長兒子魚絕智伯而去之三年將東之越而道聞智伯囂之見殺也謂御者曰還車返吾將死之御者曰夫子絕智伯而去之三年矣今返死之是絕屬無別也長兒子魚曰不然吾聞仁者無餘愛忠臣無餘祿吾聞智伯之死而動吾心餘祿之加於我者至今尚存吾將往依反而死

趙襄子問於王子淮曰吳之所以亡者何也對曰吳君

去而不忍襄子曰宜哉吳之亡也去則不能賞賢不忍則不能罰姦賢者不賞有罪不能罰不亡何待

魯人攻鄆曾子辭於鄆君曰請出冠罷而後復來請姑毋使狗豕入吾舍鄆君曰寡人之於先生也人無不聞今魯人攻我而先生去我我胡守先生之舍魯人果攻鄆而數之罪十而曾子之所爭者九魯師罷鄆君復修曾子之舍而後迎之


卞莊子魯卞邑大夫也性好勇嘗刺虎管豎子止之曰兩

虎方食牛牛甘必爭鬪則大者傷小者亡從傷而刺之
一舉必有兩獲莊子然之果獲二虎齊人欲伐魯忌下莊
子不敢過下莊子善事母母無恙時三戰而三北交遊
笑之國君辱之莊子受命顏色不變及母死三年魯興
師莊子請從見於魯將軍曰初與母處是以三北吾甚
辱焉今母沒矣請塞責遂赴敵獲一甲首而獻之曰此
塞一北又入獲一甲首而獻之曰此塞再北又入獲一
甲首而獻之曰此塞三北將軍止之請為兄弟莊子曰

三北以養母是子道也今士節小具而塞責矣吾聞之士節不以辱生遂反敵數十人而死君子曰三北而塞責滅世斷家於孝不終也

趙襄子飲酒五日五夜不廢酒謂侍者曰我誠邦士也夫飲酒五日五夜矣而殊不病優莫曰君勉之不及紂二日耳紂七日七夜今君五日襄子懼謂優莫曰然則吾亡乎優莫曰不亡襄子曰不及紂二日耳不亡奚待優莫曰桀紂之亡也遇湯武今天下盡桀也而君紂也

桀紂並世焉能亡然亦殆矣



春秋別典卷十五

春秋別典跋

先仲氏輯春秋別典未脫藁而不幸下世郭郡公用
唐祠部言亟取而序之臚其目于郡乘藝文志中公
其賢於中郎遠矣顧其甫成於草創而考覈未加不
無掛甲漏乙年代倒置之病貽好事者之惜走謂昔
丘明受經作傳廣記而備言表時而記月藉令輯別
以翼左迺采摭未廣而世次乖舛曷稱別典哉故特
廣閱博蒐遇有異聞輒嘿識以歸參互考訂不遺餘

力焉世縣者更類殊者析刪其繁複者什一苴其闕
畧者什三事則咸備而罔缺序則有條而不紊案之
以案三氏之遺者庶無面却適越之嘆嗟夫躬太史
者亡十篇司蘭臺者遺八表創始之難為功自古志
之矣矧仲氏列章逢治博士家言出其餘力以從事
於此且又以無年何怪乎立言之罔終哉長志未信
責在後人走媿續承殫精極慮聊以自塞其責云爾
若曰妄干載筆以附於作述之林則吾豈敢辭虞賓跋

暇思輯春秋別傳一書凡左氏內外傳及公羊穀梁
所書牋不登載於經文下別錄子史百家之言有志
未逮不意薛君先得我心也別典十五卷抄撮具見
苦心惟是各條之末不疏明出何書明人之習大都
若是君名虞畿弟名虞賓其字里新通志不載莫得
其詳矣康熙辛巳十月肅竹垞老人彞尊識

